

# Mien Breurtie

Mien breurtie is hiel klein. Zo'n klein poppie hej nog nooit zien. Alles zit der al op en an. Hij hef twie oogies. Hij hef twie oorties, een neus en een mond. Hij hef twie armpies. An een armpie zit een haandtie. An iedere haand zit tien hiele kleine vingerties. An ieder vingertie zit een hiel klein nageltie. Mien breurtie hef een hiel klein liefie. Een klein plassertie en twie bienties. An een bientie zit een voetie. An ieder voetie zit tien hiele kleine tienties. An ieder tientie zit een hiel klein nageltie.

Ik bin bliede met mien kleine breurtie. Ik mag allent mar naor hum kieken. Mangs mag ik hum even dragen. Mar ik kan nog niet met hum speulen. Hij mut eerst nog gruien. Dan kunt zien kleine oogies mij zien. Dan zal hij naor mij lachen. Dan kunt zien kleine



haandties mij vulen. Dan zal hij naor mij griepen. Dan bint zien kleine bienties stark. Dan kan hij lopen. Dan löp hij op mij an en dan zal hij met mij speulen.

Hij kan nog niet met mij praoten. Hij kan mij niet zeggen wat hij mooi vindt. Eerst mut hij hiel lang luustern. Dan leert hij de klaanken die wij maakt. Dan leert hij de woorden die wij zegt.

Dan döt hij oeze woorden nao. De klaank van oeze stem. Zo leert hij praoten.

As wij Fraans praot leert oes poppie Fraans. As wij Duuts praot leert oes poppie Duuts. As wij Nederlands praot leert oes poppie Nederlands. Ik wil gien Fraans breurtie. Ik wil een Drents breurtie.

Daorum praot ik Drents met mien breurtie.



OPA

't Is mij wat, die jeugd van tegenwoordig... 't bint almaal jongs en wichter' zee opa vanaovend. Echt zo'n opmarking die weer nergens op slat. En hij had nog meer te mostern. 'Nou wilt ze vandaag de dag de kinder meer Drents laoten praoten op schoel. Ik vind dat onzin. Laot ze maor Engels leren. Daormet kom ie wieder in de wereld. Dat Drents daar kom ie gien meter met veuruut. 'Ik bin het hielemaal niet met hum iens en dat zee ik hum ok. 'Zeg nou zölf, opa, ik kan nou al twie taolen praoten. Nederlands en Drents. En dat bint der niet veul in de wereld die mij dat naozeggen kunt. Denk je dat ik het dan niet wied zal schuppen?'